

弘

簡

錄

弘簡錄卷一百六十一

明刑部員外郎仁和弘齋邵經邦學

皇清翰林院侍講學士四世孫遠平校閱

庶官 宋六之六

劉保勳 劉蟠子籍 宋瑄 袁席 樊知古附李順

張雍陳世卿 索湘 袁逢吉 姚坦 魏羽子璠 葵

王子興 鄭文寶 董儼 何蒙 慎知禮子從吉

張佶 胡川附龍昌期 張秉父壽 黃震 邊肅

劉式 魏廷式 盧之翰

劉保勳字脩業河南人五代時處讓之子少好騎射後唐清泰中攝潞州左司馬隨著彰德軍衙內都校父卒補供奉官習刑名之學頗工詩彙維翰奇之擢太常丞歷漢為祕書丞周廣順

初以詳練法律薦兼大理正遷工部員外郎歷掌鄆宋楚三州
鹽麩商稅宋初改戶部母喪起復掌斬口榷茶徙雲安監鹽制
置使歲滿獻羨餘百萬開寶初遷司封員外監左藏庫六年知
宋州太平興國初遷祠部郎中通判晉州二年選爲江南西路
轉運使賜錢百萬三年徙兩浙東北路親征晉陽改戶部郎中
爲隨軍轉運偕侯陟勾當軍前諸事會陝西北路轉運雷德驥
調發沁州軍糧後期又命保勳代之太原平擢知并州逾年入
判大理出知昇州召歸點檢三司開拆司權領鹽鐵事遷兵部
郎中兼判三司勾院八年右諫議大夫知開封坐寃獄免雍熙
二年復起權御史中丞兼勾當差遣院北征知幽州行府事子
利涉以開封兵曹督芻粟隨軍濟巨馬河王師不利保勳馬陷
淖中利涉自後掖出之力不勝人馬相擠壓遂俱死年六十二

贈工部侍郎命恤其後擢孫巨州祕書正字後至北部郎中保
勲性純謹未嘗忤物精於吏事不憚繁劇受君命不辭難接同
僚多得其歡家無餘貲故聞者痛惜之至道三年又錄次孫世
長爲正字咸平初妻卒贈錢十萬

劉蟠字士龍渤海人漢乾祐進士解褐益都簿宋初歷安遠軍
河陽節度推官保義軍掌書記性清介能攻苦食淡然事苛刻
好設奇詐以售知人主乾德五年召拜監察御史典染院事太
祖多臨視蟠偵知駕將至輒衣短後衣芒屨持炬督役頭蓬不
治遂出迎謁上以爲勤事賜錢二十萬命代蘇曉掌京城市征
頗稱幹集太宗生辰命爲使開寶七年與殿中丞劉德音同知
淮南諸州轉運事部民販茶者衆蟠獨乘羸馬僞稱商人抵民
家求市民家不疑出與之卽擒寘于法太平興國初就遷倉部

員外郎改轉運使歲漕江東米四百萬斛以給京師頗爲稱職
秩滿乞留許再任賜金紫改駕部員外八年內艱起復知京城
陸路發運會河決韓村大發丁夫塞之命調給其餉朝議東封
擬拜水陸計度轉運使索湘副之俄歷工刑二部郎中充河北
水陸運使入判本部事籍田畢遷左諫議大夫淳化初兼同考
京朝官差遣卒年七十三賜錢十萬給其喪事 子錯初蔭大
理評事咸平二年擢進士嘗獻幸太學頌真宗頗嘉賞之出示
輔臣召試命直史侁累遷至戶部郎中終三司鹽鐵副使

宋瑋字寶臣渭南人監察御史鸞子乾德中及第解褐青城簿
辟吳廷祚永興書記擢著作佐郎知綿州太宗改右贊善大夫
峽路運副代還賜緋魚出知秦州有善政就拜監察御史充陝
西轉運使以治績賜錢五十萬再知秦州安集諸戎部內清肅

雍熙初名歸場金紫授度支判官遷屯田郎中知益州屬歲饑多盜以方略擒捕招輯盜屏息下詔嘉獎端拱初就拜右諫議大夫爲西川轉運使加左諫議改陝州性清簡歷官三十年未嘗問家事好寫書常聚至數千卷以貽子孫曰使不忘本也淳化中移蘇州值三吳饑疫瑞病卒年六十一上聞嗟悼錄其子明遠爲浦城簿復登淳化進士爲都官員外郎柔遠亦及第垂遠闕門祇候

袁廓劔州梓潼人舉蜀進士入宋歷雙流西平二簿勾稽漏籍得民丁萬餘州將薦其勤職遷上蔡令課最罷右贊善大夫御史府分領推事掌樞貨務性夸誕敢大言好詆訐太祖待以奇士太宗遷殿中丞出知楚州歸掌京師市征歲中增課數萬緡賜緋魚資錢五萬命按錢俛納土得以便宜從事藉浙中諸州

軍倉庫之物悉輸京師詔罷異之每公宴必別席而坐復命知
邠拜監察御史通判房州幾察秦王廷美賜白金三百轉殿中
侍御史戶部度支判官與陳恕李惟清專計度芻糧改戶部員
外郎籍田轉本曹郎中判戶部勾院廓強項好爭數與判使等
較曲直於上前上每優容之然以勾稽過密由是簿領擁積爲
郡吏所訴詔御史辨問廓謁見宰相趙普自理普面責與侯莫
陳利用交通狀廓驚慙泣下不能對數日出知溫州就遷鴻臚
少卿與同郡袁仁甫不協互有論奏上遣光祿丞牛韶往按廓
以憤死上聞追悼驗仁甫所訴無實特免韶官削仁甫名配隸
商州贈廓右諫議大夫錄其子丘賀爲奉禮郎

樊知古字仲師其先長安人曾祖偁濮州司戶參軍祖知論事
吳爲金壇令父潛事李景知漢陽石埭二縣因家池州知古初

名若水應舉不第謀歸朝僞爲魚釣往來采石江上以小舟載繩維南岸疾抵北岸以度江之廣狹開寶三年詣闕上書言江南可取狀太祖令送學士院試賜及第調舒州軍事推官恐老母與親屬留者爲江南所害詔煜令遣之煜間命厚給齎裝護送至境七年召拜右贊善大夫王師倚爲鄉導下池州命領州事州民保險者擊之連拔二砦擒其魁以獻餘潰散獻議造浮橋先試於石碑口移至采石三日而成不差尺寸事平拜侍御史乘傳按行江南諸州詢訪利病兼知轉運事奏蠲江南官茶十分之八征其餘以便商人增市直以惠小民罷鐵錢十當銅錢一民甚便之太宗卽位改今名授庫部員外郎換金紫轉京西北路轉運加虞部郎中改知邠州移鳳翔入爲鹽鐵判官出領荆湖轉運使雍熙初遷比部郎中會河朔用兵分諸郡爲東

西兩路以給漕輓以知古爲東路運使端拱初遷右諫議大夫
移河北西路二年就加措置營田使奏請脩城木五百餘萬牛
革三百萬上曰所請過當恐重困吾民令有司量給官物與之
度支李惟清請發河南十七軍州轉粟以備河北軍儲上恐妨
農不許惟清固請上遣左正言馮拯乘傳與議知古請俟農隙
令民轉餉所言稱旨拜給事中知古性明俊有才力史幹捷給
措辭辨治累任轉運甚得時譽然以李煜時用兵權宜調斂
知古悉奏爲常額又知古微時尋於豫章洪氏至是以洪氏嘗
掌昇州權酷通錢數百萬資償銅錢以快意時論少之俄爲
戶部使頗以職事不治詔書切責聲名益減素與陳恕親善上
嘗言及計司事有乖違者以爲知古輕佻恕具以告後因奏事
自解上怒恕漏泄兩罷之出知梓州改西川轉運使知古鬱鬱

不得志常稱足疾未嘗按行郡縣蜀中雖號富饒然土狹民稠
耕種不足以給兼并者益規厚利自歸朝後庫藏悉入內府有
司於常賦外更置博買務禁商旅不得私市布帛蜀民重困淳
化中青城民小王波語其衆曰吾疾貧富不均爲汝輩均之乃
聚徒攻陷青城掠彭山殺縣令齊元振旁邑響應是年冬小波
中流矢死衆推其妻弟李願爲帥初黨與纔百人州縣失於備
禦所在蠶起遂至萬餘攻蜀州殺監軍王亮及官吏陷邛州賊
勢益張舉至數萬陷永康軍雙流新津溫江郫縣縱火大掠往
攻成都燒丙部門不利引去陷漢興彭州旋陷成都官吏走東
川知古坐擅離所部制置無狀朝廷特宥之詔復令掌兩川漕
運尋改知均州以懸悻卒年五十二上嗟憫賜其子漢公同學
究出身

張雍德州人姿貌朴魯中丞滕中正決其異日顯達壽考以女
妻之開寶六年以毛詩中第釋褐東關尉太宗遷至祕書丞開
封推官坐與劉保勳同免尋復爲御史臺推直官淳化中累遷
戶部使出知梓州就命爲西川轉運使王小波亂雍訓練士卒
得三千餘人募彊勇千餘守城釐綿州金帛以資帑藏命推官
陳世卿書記施謂權鹽謝濤治戎器伐山木爲竿銷鐘磬爲箭
鏑紐布爲索器械悉備賊渠相里資衆十餘萬附城下雍與監
軍盧斌登堞望之兵皆老弱無鎧甲斌請開北門出擊雍不可
曰賊或詐見老弱設伏誘我且城中吏民心未定脫墮姦計非
良策也俄果有卒凭敵樓呼嘯將爲外應雍亟斬以徇賊設梯
衝火車晝夜鼓譟城中大恐雍命發機石碎之火箭雜下賊稍
退復於城西北隅治攻具雍命軍士曰開東門出擊賊賊望見

果伏精甲於城東以待。雍乃密絕敢死士百輩出西北焚其攻
其自午達申殆盡賊驚以爲神。凶黨數乘城戰皆不利。一日北
風晝晦賊乘風縱火急攻北門。雍與斌等領兵據門立矢石間
固守不動賊爲之却。長圍八十餘日。會石知頤來援始潰去。遣
謂入奏手詔褒美擢雍給事中。餘遷搢有差景德初雍累遷至
兵部侍郎同知審官院車駕朝陵判留司尚書省出知鄧州以
尚書右丞致仕。卒年七十。雍小心吝嗇蒞事勤恪好爲米鹽苛
察以肅下情。其清幹愛知益矯厲以取名譽所至晏犒幸皆裁
節公錢聚爲羨餘會集賓佐纔糲食而已。在三司置簿籍有按
前悉馬前悉中悉之日頗爲時論所訾。子太冲官殿中丞
陳世卿字光遠南劍人登進士爲衡州推官改梓州世卿素善
射蹇薄城時獨當城一面親射中數百人賊爲稍却丁外艱雍

表其有材復出視事就改掌書記還遷祕書郎歷廣州通判加
博士召見賜緋景德初擢福建轉運使規畫南劔安仁等銀場
歲增課羨累遷荆湖北路轉運使屬澧州慈利縣下溪等四州
蠻侵縣境朝命與祇候使方知澧州劉仁霸同討之遂還所侵
地標正經界取其要領納還所掠漢口復置澧州武口等砦以
控制之賜詔嘉獎還朝屢述溪洞利害召對願効煩劇授祕書
少監知廣州加賜金紫至郡奏除計口買鹽之制人多便之卒
年六十四錄于南安主簿儼爲太祝

索湘字巨川滄州鹽山人登開寶進士調鄆州司理叅軍受詔
鞫齊州大獄連逮千五百人事隨以白太平與國四年和峴薦
其能累遷監察御史命與戶部推官元玘按行河決民田改河
北運副經度供餽以能幹聞加屯田員外郎會君子館敗契丹

乘勝據中渡橋塞土門將趨鎮州諸將計議未定湘爲田重進
畫謀結大陣東行聲音會高陽闔敵果擁衆邀于平鹵城我師
乘夜而南入鎮陽據唐河乘其無備破砦柵敵兵遁走雍熙中
召爲鹽鐵判官改駕部員外端拱二年陞虞部郎中河北轉運
使有訟其擅易運絲自用者責授膳部員外知相州會羣盜白
晝抄劫湘擇精銳三百掩擊盡擒之運使王嗣宗狀聞詔復舊
官爲河東轉運使遷忻州推官石宗道憲州錄事胡則爲幹職
自隨所至州郡勾檢其簿領明年大將王超等率師趨烏白池
抵無定河水源涸絕軍士渴乏湘命輦大鋏千枝隨令鑿井衆
賴以濟真宗卽位入爲右諫議大夫復充河北轉運使奏罷郡
民戍釀并靜戎威武二軍鬻茶及北砦山麓銀冶德州舊賦民
馬給驛又役民爲步遞湘至悉代以官馬兵卒人皆便之疏言

樵楊易雜姦偽恐啓邊釁又新樂蒲陰兩縣地窄非屯兵之所
皆奏罷之湘長於吏事所歷邊郡必廣儲畜爲備豫計出入軍
旅頗著能名建議茶茗與蕃夸互市道遠多損許商賈緣江載
詣邊郡既免道途之耗復有征算之益咸平二年入爲戶部使
受計詳定三司編敕坐與王扶父相請托擅易版籍責授將作
少監後復知廣州卒其子希顏護喪歸葬

袁逢吉字庭之鄂陵人曾祖儀仕唐以軍功至黃州刺史祖光
甫尉氏令父蟾大理評事逢吉四歲能誦爾雅孝經七歲兼通
論語尚書周太祖召試賞其精習賜束帛開寶八年擢三傳第
釋褐清江尉知州王明薦其能就除豐城令運使張去華條上
治狀召爲春秋博士淳化中累遷至水部郎中呂蒙正薦其經
術宜任學官會蜀叛授西川轉運使至道初徙荆湖北路憚遠

不赴罷知夔州川陝採訪使上其治迹與朱協李虛已薛顏邵
暉查道劉檢同賜褒諭祥符中歷官鴻臚少卿卒年六十九逢
吉性脩謹練達時務郢州牧馬草地侵民田數百頃牒訴連不
決命逢吉按視至則悉還所侵田民咸德之兄及甫歷京東峽
路轉副使至駕部郎中子成務比部員外郎京東轉運副使從
子楚材至虞部員外郎

姚坦字明白曹州濟陰人開寶中擢第調將陵尉歷知潯州太
平興國初召還爲著作佐郎諸王出閤選爲皇子翊善賜緋魚
歷轉考功郎中仍爲益王府翊善坦性強固王嘗爲假山旣成
召賓僚樂飲坦獨俛首王強使視云但見血山耳安得假山王
驚問故對曰此山皆民租所爲每見州縣催科捕人父子兄弟
鞭笞流血被體非血山而何時大內亦爲假山聞而毀之王好

佚豫坦每暴揚其事上諭曰元傑知書好學亦足爲賢王少不
中節須婉辭規諷頃之左右教王稱疾不朝太宗召乳母問狀
答曰王本無疾徒以姚坦檢束居常不得自便故成疾耳上怒
曰吾選端士輔王爲善王不能用而詐稱疾病此必爾輩爲之
謀耳因命梓至後苑杖之召坦慰曰卿居王宮能以正道爲羣
小所疾大爲不易卿勿慮讒間朕必不聽王薨改衛尉少卿判
吏部南曹真宗卽位以其賈直取名不得大用景德初求補郡
知鄧州運使表其治狀詔嘉獎之祥符初復知光州卒年七十

五

魏羽字垂天婺源人自少屬文李煜召置弘文館時建當塗爲
雄遠軍以羽爲判官王師渡江以城降擢太子中舍仍舊職金
陵平知興州太平興國初知棣州改京兆府六年詔詣瀛州覆

軍市租得隱漏數萬計因言有司調遷尖平疏窳何由上達本
州錄事叅軍郭震十年未代河間令崔能前任卽墨未滿歲遷
秩請罪典司以肅欺弊賜詔褒諭遷太常博士歷官戶部鄜中
疏言三司職官頗衆願省其半可以責成仍條列利病二十事
詔下有司詳議皆以爲便改鹽鐵判官時北邊多警朝議耕戰
之衝拜羽河北東路營田副使改兩浙轉運使淳化初遷爲度
支鹽鐵使先是三司簿領繁積吏緣爲姦雖嘗更立所制未爲
適中羽請依倣唐制分天下郡縣爲十道兩京爲左右計各置
判官領之以羽爲左計使董儼爲右計使中分諸道以隸焉未
久復以非便罷守本官出知滑州真宗累遷權知開封軍駕北
巡判留司三司再爲戶部度支以疾解職二年五十八羽強力
有吏幹小心謹事出入計司凡十八年習知金穀之事然頗傷

煩悉不達大體太宗亦言其有心計但無執守與物推移耳歷

劇職始踰四十鬚髮盡白子瓘守川之奏補校書郎知開封

倉曹參軍持法精密明吏事上元起燈山宦者挾勢誅索瓘密

以間詔杖遣之以大理寺丞知衡山縣歷官提點廣南西路刑

獄邕州獠戶婦女緣道負沒爲傭者千餘瓘悉奏還之就除轉

運使蠲劉銀時雷化欽高州計口稅減柳州無名役四百名爲

慶支判官徙梓州路轉運累遷太常少卿知廣州疏東北城門

鑿東西澳爲水閘時其啓閉拜右諫議大夫坐送貢餘椰子煎

餉京師降知鄂州復陝西河北運使以給事中知開封政事嚴

明吏民憚之俄因內東門關得賂遺物付府窮治獄未上內降

釋罪瓘不行執奏諫官吳奎論劾降知越州儂寇發獨廣州城

堅不能下論功遷工部侍郎集賢院學士兼廣東經略安撫使

召還糾察在京刑獄進龍圖閣直學士知荆南五溪蠻彭士義
叛條上三策以招徠爲上守禦爲下攻取爲失卒如所議徙澶
滑鄆三州以吏部侍郎致仕卒璿居官所至整辦與人置對未
嘗屈然專任機數不稱循吏 弟琰字子浩以恩授祕書正字
爲吏強敏名濟于璿累官司農卿知福州徙廣州以疾告知江
寧晚昏聩奏劾召判刑部進衛尉卿卒

王子與字希孟莒人曾祖甲以義勇爲鄉人所推唐末淄青徐
兗皆南結吳人以拒梁梁得三鎮吳人北侵益急沂密尤被其
害州民聚爲八砦以扞寇寇署甲爲八砦都指揮使祖徽襲父
職晉末賊帥趙重進掠高密徽戰沒父璉復嗣其職周世宗平
淮陽始去兵卽農厚自封殖命子與業文辭登大平興國進士
解褐北海簿歷大理評事使西蜀決獄還累遷太常博士真宗

遷殿中侍御史因對與三司論利害推子輿爲長轉度支員外郎每事上計司移報稽滯求兼省職因命爲鹽鐵判官仍領制置城課五十餘萬咸平三年充淮南轉運子輿精於史事周知利害裁量經制公私便之所至郡縣以公事申請者文牒紛委頃刻待報皆決遣略無凝滯明年召拜右諫議大夫戶部使方奏事疾作仆地掖出至第卒

鄭文寶字仲賢襄城人南唐右千牛衛大將軍彥華之子以蔭授奉禮校書二郎煜歸朝不忘舊恩欲一見衛者難之乃被繫篋目爲漁者以見煜以爲忠後補廣文館生受知李昉登太平興國進士除脩武簿再遷光祿丞獻文召試改著作佐郎通判潁州外艱起知州事拜殿中丞使川陝均稅次渝涪聞夔州廣武卒謀亂以計平之遷陝西巡副許便宜從事歲凶誘襄民出

粟活饑民八萬餘口。會秦隴賊趙包聚徒數千將趨劔閣。附李順文寶移書蜀郡分兵討襲殲焉。前後自環慶部糧越旱海入靈武者十二次。曉達蕃情習其語言。經由部落每宿。會長帳中。往往以父呼之。遷太常博士。內侍方保吉誣與陳堯叟交游。故薦其弟堯佐。驛召置對。文寶上書自明。太宗察其誣。坐保吉罪。厚賜文寶而遣之。俄加工部員外郎。有龍猛卒戍環慶。七年不得代。思歸謀亂。文寶矯詔以庫金給將士。自劾請償詔免之。建康。禁販青白鹽。許商人轉安邑。解鹽於陝西。官獲其利而諸羌益內行之。數月戎人乏食。相率寇邊。內屬萬餘帳亦叛。上遣錢若水馳傳往視。悉除其禁。召諸族撫諭。乃定。朝議城古威州。遣內侍馮從願來訪。文寶言城之便。但環州至伯漁。伯漁抵青岡。青岡拒清遠。皆兩舍。而清遠當翠山之口。扼塞門之要。芻車野

宿行旅頓絕威州隔城東隅。堅石盤互。舊乏井脉。請先建伯漁
青岡清遠三城。爲頓師歸重之地。俟二年間。秦民息肩。營田積
粟。邊儲充實。脩五原故城。專三池鹽利。以金帛啖黨項酋豪子
弟。使爲朝廷用。不惟安朔方。制豎子。至於經營安西。綏復河湟。
此其漸也。詔從其議。復以金帛誘蕃酋鬼囉鬼悉俄留其質子
與手書。要約許爲刺史。令陰圖繼遷而鬼囉等反告繼遷。繼遷
上表請罪。上怒文寶猶含容之。旣而文寶復請禁鹽邊民冒法
煮罪者。衆席義叟決獄陝西。廉得其狀。以語中丞李昌齡。昌齡
以聞文寶。又擅減解鹽價。三司奏歲虧課二十萬。下御史臺鞠
問。具伏。詔書切責。貶藍山令。移枝江。真宗徙京山。咸平中。召還
授殿中丞。掌荆南樞貨務。會慶州發卒護芻糧。詣靈州。文寶策
其必敗。未幾果爲繼遷所襲。遷召文寶問計。因獻河西龍右圖。

叙其地利本末且言靈州可棄狀時方遣大將王超授靈武卽復文寶工部員外郎隨軍轉運甫至環或言靈州已陷文寶乃易服單騎問道抵清遠盡得其實遂奏班師就除本路轉運使上疏請再葺清遠軍王漢忠以爲生事遂徙河東又上言乞徙置管內廣銳兵萬餘於近南諸州就糧宰相李沆等言其非便上命錢若水詳議若水所對與沆同乃罷之先是麟府屯兵悉仰河東於魏河潤裁數十步而往來阻隔土人利於艱至則芻粟增價乃請文寶於府州定羌軍經度置浮橋人以爲便繼遷圍麟州令乘傳晨夜赴之聞解遷刑部員外郎賜金紫項之寇準薦其熟於西事可備驅策復任陝西轉運復有言其張皇者又代以朱台符景德初契丹來犯仍徙河東安輯所部募鄉兵張邊備領蕃漢兵赴河北手詔褒諭未幾復涖京西陳和議經

久之策上嘉之三年召選遇疾祥符初卒年六十一文寶好談方略以功名爲已任久在西邊參預兵計心有餘而識不足又不護細行所延薦雖多未嘗慎擇晚年病發以其子郟州推官於陵爲大理寺丞移知襄城以便發文寶多撓縣政然能爲詩善篆書工鼓琴有集二十卷撰談苑二十卷江表志三卷

董儼字望之洛陽人太平興國進士解褐大理評事歷遷淮南西路運副就命知光州儼狂躁務進不樂外郡上書乞還京師太宗大怒削館職徙知忠州俄復官與王繼昇同領水陸發運使轉刑部員外郎端拱初進郎中三司度支副使坐翟馬周事責海州團練副使移知秦州踰年改知泉州召爲京東轉運使歷知江陵府景德中入朝命裁決開封滯囚俄判吏部銓以工部侍郎出知青州屬其姻家御史王濟言於西川轉運黃觀求

薦已知益州不遂與都監趙贊密奏觀嘗酒廢職觀具述求薦
反覆狀責授山東南道行軍司馬會赦起知郢州病疽卒年五
十四儼俊辨有材然不學無操行所至以賄聞又廣畜姬媵頗
事豪侈用傾狡圖位終以是敗士夫醜之東封恩復其官子仲
容仲宗並爲太子中舍兄偉至殿中丞

何蒙字叔昭洪州人少精春秋左氏傳李煜時獻書言事署錄
事參軍入宋授洺州推官太平興國五年調遂寧令太宗征契
丹遂作詩以獻召見授右贊善大夫三遷水部員外郎通判廬
州郡中火燔廨舍權務俱盡蒙假民器貸鄰郡麴米爲酒旣而
課增倍部使上其狀詔賚緡錢獎之稍遷司門巡撫使潘慎修
薦其材敏驛召至京訪以江淮茶法蒙條奏利害稱旨賜緡魚
及錢十萬後二日復對又上淮南酒榷便宜特改庫部郎中因

命至淮右提總其事歲有美利使還留提舉在京諸司庫務求
外知溫州坐舉人不當削一官真宗名復前資請開淮南鹽禁
時下袞楊允恭以禁鹽爲便共排抑之出知梧州改水部郎中
上所著兵機要類十卷歷官至光祿少卿致仕卒年七十七

慎知禮衢信安人父溫其有詞學仕錢俶終元帥府判官知禮
幼好學年十八獻書畧校書郎爲掌書記宋初從俶子惟濟入
覲歸署營田副使入朝授鴻臚卿歷知陳州興元府母年八十
餘居宛丘懇求歸養退處十年縉紳稱其孝及服除表請納祿
至道三年以工部侍郎致仕自幼至白首歲讀五經周而後止
每開卷必正衣冠危坐未嘗少懈咸平初卒年七十七子從
吉字慶之倣之婿爲元帥府長史歸宋歷將作少監改太子右
庶子真宗倣儲換衛尉少卿卽位遷詹事頗以文酒自娛士夫

多與之游景德初判刑部留意法律天下所奏成案率多科駁
取所積犯人告身鬻之以市什器祥符初改衛尉卿糾察在京
刑獄拜右諫議大夫判吏部銓選人舊試多籍地而坐從吉爲
市羹席給之改給事中臨事敏速動心公家所至務瞭察嘗請
對陳事上多其無隱八年權知開封請屬一無所受適彙民張
斌妻盧氏與姪質交訟被搆削職天禧中復起以光祿卿致仕
卒年七十喜爲詩時有警語兼工醫術子孫登第入仕甚衆紆
朱紫者數人家富於財精治生又善爲器具分遺權要晚年進
趨彌篤以至于敗物論鄙之子鏞金部度支員外郎秘閣校理
錯太常博士

張佖初名志言字仲雅本燕人徙渭南父昉有史材歷知雜御
史省郎至殿中少監佖少有志節蔭補殿前丞旨以習儒獻文

求試換國子監丞遷著作佐郎監三白渠知涇陽縣端拱初爲右贊善大夫命按曹州民被誣殺人者發掘姦伏民寃得雪至道中通判陝州部送芻糧赴靈武就改國子博士咸平初爲陝西運副賜緋魚至延安遇夏人入寇親督兵擊敗之三年徙西川運副討王均餽餉有勞遷虞部員外郎賊平分川陝爲四路授利州路轉運使有薦其武幹者召還授如京使歷涇原麟府鈐轄兼知鎮戎軍率兵與夏人戰親射殺酋帥俘獲甚衆餘黨遁去詔書褒獎賜錦袍金帶景德中徙益州鈐轄領宜州刺史遷文思使御軍撫民頗有威惠蜀人懷之祀汾陰以爲西京舊城巡檢禮成加北作坊使充趙德明官告使以薦知秦州置四門皆開拓疆境事具吐蕃傳時朝廷方務寧邊以信輕信易事邊境數授徙邠寧路鈐轄天禧初召爲契丹國信副使再遷西

上閣門使涇原鈐轄卒年六十九信法獵書史好吟詠勇敢善射有方略其總戎護塞以威名自任子宗象兵部員外郎直史館至度支判官

胡則字子正永康人登進士補許州尉調憲州錄事參軍時命李繼隆討靈夏轉運索湘命則部送芻糧計足支一月則言爲百日備尚恐不支奈何僅一月耶湘懼無以給遣則入奏太宗因問邊策對稱旨命中書記其姓名項之繼隆移文言兵且深入糧可繼否則謂彼師老將歸欲以糧乏爲辭耳始以有餘報之湘從之後其言果效改著作佐郎員州觀察判官再遷提舉江南路銀銅場鑄錢監得吏所匿銅數萬斤籍爲羨餘不之罪改江淮制置發運使遷戶部員外郎真宗幸亳遷擢三司度支副使與丁謂厚驟得進用謂罷出爲京西轉運使坐部內訛言

相驚徙廣西按宜州重辟十九人活者九人累遷太常少卿乾
寧初復坐謂黨降知信州徙福州以右諫議大夫知杭州入權
吏部流內銓坐失舉又責池州未行復改知永興軍徙河北都
轉運使以給事中權三司使通京東西陝西鹽法人甚便之俄
坐假御史王浩官舟販鹽其子又祈買酒場為張宗誨所發出
知陳州劉隨言其好貪復徙杭州再遷兵部侍郎致仕卒則果
敢負材善交結尚風義謂貶賓客皆散則間遣人至海上償問
如平日在福州有前守陳絳所延客龍昌期為人講易得錢絳
獲罪併械昌期至卽破械館以賓禮出俸錢為償所費昌期
蜀人嘗註易詩書論語孝經陰符經老子凡百餘卷薦補四門
助教文彥博守成都召置府學改校書郎以殿中丞致仕嘉祐
中年八十餘詔取其書昌期野服自詣京師賜緋魚并絹百匹

劉敞言其異端害道其說詭誕穿鑿至詆斥周公不當推獎奪所賜罷歸卒

張乘字孟節新安人父諤字昌言南唐祕贊丞通判鄂州與州將許昌裔歸欵太祖召見勞賜良厚授右贊善大夫蜀平選知閬州太平興國中除西州運副建議土人罕習舟楫因置威權軍分隸管勾自是漕運無覆舟之患後終荆湖江浙制置茶鹽副使乘儀狀豐麗屬詞敏速善書翰太宗喜之擢冀州科解褐將作監丞通判宣州遷監察御史爲趙普所帶婁以弟之女薦知鄭州還直昭文館遷右司諫命副趙昌言制置茶鹽入爲右計司河南西道判官累遷工兵二部郎中真宗時判昭文館爲左諫議大夫連知穎襄二州徙鳳翔訴母老貧實詔給裝錢改江陵母憂起復知河南景德初換河陽瀘州駕當巡幸又徙滑

州迎謁韋城俾預從官侍食遣與齊州馬應昌濮州張晟往來
河上部丁夫繫凌以防契丹南渡召歸拜工部侍郎知審官院
歷通進銀臺封駁司糾察在京刑獄與周起同試東封路舉人
出知永興軍祀汾陰爲東京留守判官轉禮部侍郎加樞密直
學士知并州御製五言詩賜之徙相州恭疾卒生平無顯赫譽
臨事少斷好諧戲脩飾衣服潔饌具每公安或朋友會集自詔
肴膳而往家貧常賃衣以給

黃震字伯起浦城人登進士累遷著作佐郎通判遂州時有詔
給軍士錢東州獨未及軍士欲爲變震白主者曰朝廷豈忘東
川耶殆詔書稽留爾主者以爲然卽開州帑給錢如西川衆乃
定未幾詔果至震歷遷江淮發運使以論李溥與交訟奪一官
罷畏丁謂權不敢自直謂貶復起知饒州徙廣東轉運奏罷廣

南歲進異花道路便之卒詔進其官一等

邊肅字安國應天府楚丘人登進士除大理評事知於潛縣改太常博士魏羽薦爲戶部判官祠南郊超薦度支員外郎至道初太宗以三司鈞取無法置行帳司以會財用之數命肅主之帳成遷工部郎中真宗幸大名經度行在糧草改判開拆司出知曹州徙邢州先是州屢地震城堞摧圮會契丹入鎮魏深趙磁洛六州閉壁不出帝密詔肅若州不可守聽便宜南保肅匿詔不發督丁壯築城大開諸門率所部兵嚴陣以待老幼趨城者開門納之契丹莫測居三日引去擢樞密直學士徙宣州車駕朝陵徙河南還勾當三班院出知天雄軍徙真定累遷給事中與代者王嗣宗有隙諷通判東方慶訟肅貶岳州團練副使久之徙武昌安遠泰寧三軍節度副使連知光泗泰三州卒

子調終兵部員外郎福建轉運使

劉式字叔達袁州人李煜時舉三傳歸宋遷大理丞贊善大夫
通州豐利監端拱中初三年磨勘法命式主之賜緋又建議置
主轄支收司以謹財賦出納遷秘書丞與陳靖使高麗至道中
併三勾院爲一仍命式領之轉工部員外郎賜金紫式深究簿
領之弊奏免舊日江淮間橫賦逋積至多人以爲便然多所條
奏檢校過峻爲下吏所訟免官卒真宗追錄前効賜其子立本
學究出身次子立之復爲國子博士立德立禮並進士及第立

禮殿中丞

魏廷式字君憲大名宗城人少明法律監軍魏咸美以同宗延
置館舍善待之中太平興國進士授朗州法曹掾運使李惟清
奏其有吏材擢知桃源縣遷將作監丞改著作佐郎通判潁州

淳化二年始命李昌齡判審刑院以延式明練刑章奏爲詳議
官屢進對太宗悅其明辨遷太子左贊善大夫時初較廷臣殿
最命與丞旨趙鎔李著同勾當三班院多所規制越王生日令
持禮物賜之趙拜主客員外郎尋出知利州討李順就命充陝
益二路選使人奏事不時召對問方略稱旨賜錢五十萬賊平
入判大理寺至道初乘傳河朔決獄復出知宋潭二州湖南地
土沃衍民喜訟產巧僞難辨至則立裁之吏民咸服轉吏部員
外郎知桂州真宗改工刑二部郎中會王繼恩有罪下吏命同
按之踰宿而獄具俄知審官院通進銀臺封駁司拜右諫議大
夫知審刑院出知涇州卒年四十九錄其子舜卿太祝禹卿同
學究出身延試所至以嚴明稱剛果敢言上頗厚遇之然性傾
險喜中傷人君子憚其口而鄙其行

盧之翰字維周祈州人曾祖玄暉鴻臚卿祖知誨人雄軍掌書記父寵蔡州防禦判官之翰少篤學家貧客遊館于單州防禦使劉乙登第授大理評事知臨安三遷殿中丞通判洺州募城中丁壯決滄御河以固城壁契丹入不能犯吏民詣闕借留名還遷太常博士歷河東京西轉運副使建議導淇河合于淮達許以便漕運累遷吏部員外郎討李順兼西川安撫轉運使坐薦大理丞李憲犯賊抵死又心知副使鄭文寶禁蕃商貨鹽非便不為勸止左授國子博士領使如故尋復職浦洛河之敗詔分三道護送之翰違詔擅併為一大失輜重詔博士王用和乘傳逮捕繫獄除名貶許州司馬明年起為工部員外同勾當陝西轉運真宗復吏部以久次名拜禮部郎中賜金紫復遣之任咸平初有疾代還未幾復為京西運使朝議城故原州以張守

爲之翰沮罷之其後西鄙不寧詔葺爲鎮戎軍帥之翰知歸州
三年授廣南西路轉運就改太常少卿知廣州無廉稱與運使
凌策不協陰發其事徙知永州卒年五十七

弘簡錄卷一百六十二

明刑部員外郎仁和弘齋邵經邦學

皇清翰林院侍講學士四世孫遠平校閱

庶官 宋六之七

陳靖

林勳附

邵曄

劉師道

盧琰

子士宗

王陟

李士衡

子丕籍

靳懷德

梁鼎

楊覃

從子大雅

馬元方

凌策

宋搏

鄭向

趙賀

李垂

子仲昌

陳知微

李防

梅詢

陳貫

子安石

狄棐

子遵度

郎簡

張若谷

陳大素

馬尋杜曾

張傳

崔立

張逸

張旨

鍾離瑾

張洞

陳靖字道卿莆田人父仁璧仕陳洪進爲泉州別駕洪進歸朝有豪猾負儉爲亂靖徒步謁搏運使楊克巽陳討平之策授陽

翟縣簿契丹犯邊上五策于朝曰明賞罰撫士衆持重示弱待利而舉帥府許自辟士將帥專制境外太宗善之改將作監丞爲御史臺推勘官父喪起復秘書丞直史館判三司開拆司會上欲復井田未有能建議者靖慨然上疏以爲法難遽行宜先命大臣爲租庸使或兼屯田制置副以三司判官通知民事者二人兩京東西千里檢責荒地籍逃民產募人耕作賜以室廬犁種口食不足給以庫錢別其課爲十分責州縣勸課分殿最爲三等其最者令佐免選超資殿者增選降資每州通以諸縣田爲十分視其殿最以行賞罰候數歲盡罷官屯田悉用賦民然後量人授田度地均稅約井田之制立爲定法頒行天下太宗詔宰相呂端曰靖此策深合朕意命名見賜食下三司陳恕等雜議詔以靖爲京西勸農使擇大理丞皇甫選光祿丞何亮

副之選等言其功難成帝不謂然後以羣議終不同罷之出請
知婺州再遷刑部員外郎真宗卽位復列前所論勸農事言國
家禦西北戎仰東南食設有不足則誤大計請自京東西及河
北諸州大行勸農之法以殿最課州縣官吏歲可省江淮漕百
餘萬有詔條上除爲京畿均用使請令刺史行春縣令勸耕賜
孝悌力田者爵置五保以檢察姦盜籍游惰之民以供役作行
三司議皆不果行後歷度支判官淮南運副兼管勾發運司公
事徙河南轉運使論前李氏橫賦於民凡十七事詔罷其尤甚
者徙知潭州祀汾陰爲行在三司判官歷京西東轉運使知泉
蘇越三州歷遷集賢院學士知建州復徙泉州拜左諫議大夫
與丁謂善以老疾轉秘書監致仕卒平生好學通古今多建書
於農事尤詳林勳者賀州人莖政和進士爲廣州教授高宗

建炎三年。歐本政書十三篇。言國家兵農之政。率因唐末之故。今農貧而多失職。兵驕而不可用。是以饑民竄卒。類爲盜賊。宜倣古井田之制。使民一夫占田五十畝。其有羨田之家。毋得再市。其原無與游惰末作者。皆驅之使隸農耕。以田之羨者。雜紐錢穀以爲十一之稅。又言宋之二稅視唐增至七倍。今本政之制。每十六夫爲一井。提封百里。爲三千四百井。率稅米五萬一千斛。錢萬二千緡。每井賦二兵馬一匹。率爲兵六千四百人。馬三千四百匹。歲取五之一。以爲上番之額。以給征役。無事則又分爲四番。以直官衛給守衛。是民凡三十五年而役使一歲。歲食米萬九千餘斛。錢三千六百餘緡。無事則減四分之一。皆以一同之租稅供之。匹婦之貧。絹三尺。綿一兩。百里之縣。歲收絹四千餘疋。綿三千四百斤。非蠶鄉。則布六尺。麻二兩。所收視絹

綿率倍之。行之十年，則民之口算官之酒酤，與凡茶鹽香礬之
權，皆可弛以予民。其說甚備。書奏以爲桂州節度掌書記。到任
又獻比校書二篇，大略謂桂州地東西六百里，南北五百里，以
古尺計之，爲方百里之國四十。當墾田二百二十五萬二千八
百頃，有田夫二百四萬八千，出米二十四萬八千斛。祿卿大夫
以下四千人，祿兵三十萬人。今桂州墾田約祇萬四十二頃，丁
祇二十一萬六千六百一十五。稅祇錢萬五千餘緡，苗米五萬
二百斛，有奇。州縣官不滿百員，官兵五千一百人。蓋土地荒蕪，
而游手末作之人衆，是以地利多遺，財用不足，皆本政不修之
故。朱熹甚愛其書。陳亮亦謂此書考古驗今，思慮周密，可謂勤
矣。後世爲井地之學者，孰有加於勸者乎？要必有英雄特起之
君，用於一變之後，成順致利，則民不駭而可以善其後矣。

冊曰井田之學悉爲空言聊存其槩以備化原

邵晔字日華其先京兆人唐末喪亂曾祖岳舉族之湖南彭玕
刺全州晔爲判官遂家桂陽祖崇德道州錄事參軍父簡連山
令晔幼嗜學登太平興國進士解褐邵陽縣簿改大理評事蓬
州錄事參軍知州楊金性暴率誣民張道豐三人劫盜悉寘于
死晔自令核實不聽旣而捕獲正盜金坐削籍晔代還引對太
宗嘉獎以能活平民賜錢五萬擢光祿寺丞仍以金事戒諭天
下尋使廣南採訪刑獄歷遷工部員外郎淮南轉運使景德中
假光祿卿充交趾安撫國信使會黎桓死子龍鉞嗣兄龍全弟
龍廷殺鉞自立龍明護復率扶蘭峇兵攻戰事聞改命晔爲緣
海安撫使許以便宜爲設方略貽書諭朝廷威德俾速定位明
護等聽命奉龍廷主軍事有詔俟其事定卽以黎桓禮物改賜

新帥擘上言不若俟龍廷貢奉別加封爵而寵賜之真宗嘉納使還改兵部員外郎賜金紫嘗上邕至交水陸路及宜州山川等四圖頗詳控制之要判三司勾院坐失舉停任祥符初起知兗州表請東封就命爲京東轉運使禮畢拜刑部郎中再遷右諫議大夫知廣州鑿內濠通舟輒不能害卒年六十三

劉師道字損之開封東明人右樞密澤之子登雍熙進士授和州防禦推官歷保寧鎮海節度從事凡十年王化基呂祐之薦于朝擢著作佐郎遷殿中丞出知彭州就加監察御史運使劉錫馬襄上其治跡名歸會浦洛之敗奉詔劾白守榮太宗獎其勤面賜緋魚命使西川時經李順之亂有言川陝豪民多役旁戶小民爲佃客平居伏如奴隸有難則鳩集之請釋豪民爲耆長迭主旁戶有勞則授以官師道還奏迭使主領則爭忿滋多

署以名級又重增授害非便能之改祠部員外郎出爲京東轉運使遷度支副使咸平初范正辭薦其材堪長民徙知潤州三年改淮南轉運兼江浙荆湖發運使以漕事入奏累遷三司使從幸澶淵判隨駕三司充都轉運使坐弟幾道舉進士與考官陳堯咨交通賁授忠武軍行軍司馬郊恩起爲工部郎中知復與秀州祥符二年改兵部郎知潭州遷太常少卿生平敏於吏事所至有聲吏民畏愛長沙當湖嶺都會剗煩析滯案無留事歲滿復加樞密直學士換左司郎中留一任以暴病卒年五十四性慷慨尚氣善談世務與人交敦篤工爲詩與楊億輩酬和時論稱之錄幾道試校書郎

盧瑛字錫圭涇州人右諫議大夫浚子登太平興國進士解褐歷城縣簿以大理評事知安吉縣改太常丞通判并州就除博

士爲開封判官古謝日眞宗特召升殿面諭賜緡錢尋奏獄空
有詔獎之遷工部員外郎爲河北轉運副使時北鄙未寧調發
軍儲糧道不絕琰以職務修舉進秩刑部郎賜金紫會城祈州
命專董其役幸澶州琰單騎赴行在名對勞問轉大理寺丞契
丹請和優拜吏部判三司勾院兼侍御史知雜事祥符二年爲
三司度支副使祀汾陰判留守三司加吏部郎中拜右諫議大
夫知永興軍勤於吏職所至以幹集聞頗知命先母而卒年五
十九母尚年八十餘上憫之官其子士倫太常博士給祿終喪
至工部郎中度支副使 士宗字公彥舉五經爲隰州判官歷
審刑院詳議編敕刪定官提點江西刑獄侍講楊安國薦其經
術仁宗御延和殿詔講官悉升殿聽士宗講易明日復命講泰
卦授天章閣待講賜三品服加直龍圖閣判流內銓言李參郭

申錫兩人皆爲時用決河訟當驗問不宜遽鞠詔但黜申錫爲
州進士宗直學士知審刑院通進銀臺司仁宗神主祔廟禮院
請以太祖太宗爲一世而增一室上宗據禮太祖之廟萬世不
毀其餘昭穆親盡卽毀示有終也今僖祖親盡當遷合於典禮
不當添展一室後卒從增室之說議者咎之出知青州入辭論
知人安民之要勸英宗守祖宗法以病改沂州熙寧初以禮部
侍郎致仕卒年七十一士宗本以儒者長刑名之學在刑部審
刑前後十數年人多稱其仁恕

王陟潞州上黨人登淳化進士補鳳州團練推官督運有勞遷
晉州觀察推官至道初度支李擇言薦爲著作佐郎通判大名
眞宗尹京留爲開封司錄參軍前司錄閻仲卿喜議論敢爲屢
升殿奏事眞宗頗不悅之陟獨以謹幹被待遇卽位召賜緋魚

袋改著作郎進推官乘傳陝西督餉靈武咸平初遷太常博士
爲河東轉運使賜金紫時趙保吉納款屢遣陟與內侍張崇貴
裁度邊事正其經界又副崇貴使夏州賜誥命代歸與刑部員
外董龜正同考試貢士改工部員外郎知棣州召入判三司鹽
鐵勾院卒上以京府之舊甚憫之錄其子若拙奉禮郎後官太
常博士若谷太廟齋郎

李仕衡字天均父益家饒於財由成紀徙京兆登進士調鄠縣
簿京尹田重進命鞠五死囚士衡平反活其四重進稱之曰君
有陰施必高大其門徙知彭山就加大理評事遷光祿丞父坐
不法誅仕衡除名會赦寇準薦復其官領渭橋輦運通判邠州
遷秘書丞知劔州王均反度不能守棄城焚芻粟輦金帛東守
劔門賊至與鈐轄裴璘迎擊之斬首數千級入奏擢度支員外

郎賜緋魚復論棄城罪降監度州稅名還判三司鹽鐵勾院時
因梁鼎言調丁夫輦解鹽官自鬻之仕衡以爲困民不可聽已
而關中大擾乃罷鼎擢仕衡荆湖北路轉運使徙陝西歲計軍
費悉皆自辦罷出內帑緡錢真宗幸洛獻粟五十萬斛餽京西
三十萬斛上多其材名爲度支副使言關右旣弛鹽禁而永興
同華耀等處猶科率賣鹽年額錢詔悉除之遷司封郎中爲河
北運使又奏罷內帑所助緡錢民苦歲給諸軍帛七十萬皆預
假里豪倍償其息仕衡請方春戶給錢至夏輸帛民獲利而官
用足會封泰山見上于行宮獻錢帛芻糧各十萬遷右諫議大
夫祀汾陰又助錢帛三十萬與林特同提舉兩京陝西轉運事
權知永興軍進給事中以樞密直學士知益州旱蝗發粟賑民
多以所部供軍物爲貢及邊儲闕議者以爲言帝不之罪累遷

工刑二部侍郎權知天雄軍徙青州盜起淄青間以計誘梟賊首獻于朝名爲三司使更陝西入粟法使民得受錢與茶又許吏私市羊送京免其算聽民自採木輸官用償其直免羊道死并漂失破產之累帝作寬財利論以賜遷吏部侍郎仁宗拜尚書左丞以足疾改同州觀察使知相州更陳穎二州坐壻曹利用誑誤降左龍武大將軍分司西京卒追復同州觀察使生平才智過人前後管計事二十年頗以貪聞積家貲鉅萬建大第長安里中子丕緒初蔭將作監簿歷虞部員外郎請削官侍養十餘年父喪服除起爲永興軍節度判官歷通判知解與華州至司農卿致仕卒居官廉靜不爲矯激家多圖書集歷代石刻爲數百卷

靳懷德本名湘博州高唐人祖昌範殿中丞父隱禹城令懷德

中明法科解褐廣安軍判官秩滿授鴻臚寺丞歷判相廣滄莫
四州知德州運使劉通言其疊有善政連詔褒之徙知密州代
還鹽鐵使陳恕判官王濟薦換如京使連知邛與滄州祥符初
滄州吏民詣轉運李士衡借留遷文思使時江南旱歉命爲洪
處十州安撫都監改知曹州選爲益州鈐轄加領長州刺史就
遷北作坊使在劔外軍民甚畏愛之入拜西上閣門使領昭州
刺史知瀘與陝州悉心撫治頗著政績卒年七十三懷德素遊
寇準門下歷官以強幹稱然酌酒多失真宗常面戒之

梁鼎字凝正華陽人祖鉞仕蜀爲劔門闕使父文獻乘氏令鼎
登太平興國進士解褐大理評事知穉歸縣遷著作佐郎端拱
初獻聖德徽號頌試文遷殿中丞通判歙州以能聞詔嘉獎徙
知吉州豪猾爲患鼎暴其凶狀諒杖遠徙太宗賞其強幹代還

特賜緋衣犀帶寵之仍記名於御屏淳化中上書言今之知州卽古之刺史本朝考課承五代之後祇拘州縣之例徇名黜陟其有治狀顯著不加尤異或方略茂聞亦復任用大夫勸懲之理寢成苟且之風是故水旱薦臻獄訟填溢今欲致治太平宜詔有司申明考績之法務資實效庶幾官得其人民受其賜矣歷三司度支判官至道初與陳堯叟建議興三白渠及陳許鄧穎蔡宿亳數州水利墾田事具食貨志遷都官員外郎江南轉運副使就改起居舍人徙陝西坐討李繼遷還奏軍儲失期削三任連知徐密二州真宗復舊官咸平四年遷兵部員外郎知制誥賜金紫時三司督逋限嚴有久被留繫者命鼎與薛映按籍詳定多所蠲免踰月拜右諫議大夫領度支使建議西鄙未寧應令陝西所在官醫解鹽詔從之卽除制置使移文禁止商

人約束乖當又奏運咸陽倉粟實邊會粟已陳腐鼎又請以粟
與民俟秋收易新粟言者病其煩擾命林特乘傳與張詠同議
可否鼎坐改作非是罷守本官景德初內艱起復知三班院通
進銀臺封駁司出知鳳翔以居憂哭泣傷目求判西京留司御
史臺卒年五十二賜二子申甫吉甫出身鼎偉姿貌磊落尚氣
有介節居官峻厲好學工篆籀八分嘗著隱書三卷史論二十
篇學古詩五十篇

楊覃字申錫震之後曾祖承休昭宗朝以兵部員外郎使吳越
阻於楊行密因留錢塘祖巖爲鎮海軍節度副使領春州刺史
父郁早卒覃初名蟬少獻書錢俶授著作佐郎歸朝爲禹城尉
登太平興國進士授徐州觀察推官擢知戎州遷太常博士使
陝西蠲逋負淳化中轉屯田員外郎同判壽州潘慎修上其政

續詔嘉獎就命知州事丁內艱州民列狀乞留詔奪情永興節
度田重進選覃與林特同判軍府事賜緋魚仍賜御書曆給以
實俸重進不法事多抗執表求徙任不許就轉都官員外郎時
討李繼遷調發芻糧務以促辦爲斯人情怨嗟改職方員外遷
屯田郎中三門發運使呂蒙正薦其材入判三司磨勘憑由理
欠司咸平四年春旱上言古之用刑皆避三統之月漢舊章斷
獄盡三冬之月唐太宗凡斷重刑日勅減膳徹樂今春陽方盛
時雨尚愆輦轂之下獄繫甚繁望詔有司死罪未得論決俟時
雨降乃復常典仍望自今凡決重刑依唐故事以彰至仁之德
嘗獻時務策五篇曰禦戎用兵爲政選賢刑罰文多不載明年
同知貢舉出爲陝西轉運使賜金紫言繼遷雖死其子尚在且
伐喪非禮請詔邊臣謹守斥候毋得輕舉俟其衆叛覲離則亡

無日矣與副使朱台符不協徙知隨州移唐州景德二年召還屬河北兵革之後命詣澶濱棣德博等州巡撫振給之俄知潭州王師討宜賊軍須多出長沙曹利用以聞詔書褒勞加刑部郎中祥符二年任淮南江浙荆湖制置發運使改太常少卿直昭文館知廣州勤於吏事所至以幹濟稱且著廉名俄加又諫議大夫卒年五十四長子文友奉禮郎次子敏楊州司士參軍從弟蛻及從子侃傳並進士第蛻官司封員外郎 侃後避諱名大雅字子正素好學日誦萬言雖飲食不釋卷歷新息鄢陵二縣簿改光祿寺丞知新昌徙知潯州監在京商稅遷秘書丞咸平中交趾獻犀牛因奏賦召試遷太常博士又獻所爲文直集賢院出知筠袁二州歷官右諫議大夫集賢院學士知亳州卒侃樸學自信無所阿附天禧中使淮南遇風覆舟冠服盡喪

時丁謂鎮金陵遺以衣不受深恨之王欽若亦不悅在集賢二十五年不遷出其後者往往致位榮顯或笑其逝世嘆曰吾不學乎今之世人而學乎古之聖人以故至此吾之所有不敢以薦於人而自獻于天子嘗因轉對上原治十七篇所著有大隱集西垣集職林兩漢博古傳于世

馬元方字景山濮州鄆城人父應圖嘗知頓丘太宗攻幽州部芻糧沒敵中元方行求父屍不得訴於朝上哀之特爲官其兄元吉元方登淳化進士爲韋城縣簿改大理評事知萬年縣諸將討李繼遷圖輔轉餉踰瀚海多失亡獨元方所部全十九以勞遷寺丞爲御史臺推助官遷殿中丞陳恕奏爲判官言方春民貧請預貸庫錢至夏秋令以絹輸官行之出知徐州改太常博士梓州路轉運使後知鄆州以酒過降知宿州徙滑州爲京

西轉運使知應天累遷太常少卿右諫議大夫權三司使王旦
以爲盡心官職然性卞急又不納僚屬議論歲餘以煩苛罷進
給事中權知開封改并州官至兵部侍郎卒

凌策字子奇涇縣人幼孤厲志好學渡江從姚鉉於廬州登雍
熙進士夢人以六印加劔上遺之初調廣安軍判官改西川節
度推官以彊幹聞淳化三年就加光祿寺丞代還拜左贊善大
夫通判定州賜朱衣錦章御書會計李順策自陳舊諳民俗命
知蜀州巴西當餉餼孔道徙綿州加太常博士還朝爲廣南西
路轉運使進屯田員外郎戶部判官請由陸路運嶺南香藥至
南安汎舟而北大省轉送之費改職方員外郎直史館賜金紫
又由英州大源洞伐山開道直抵曲江人以爲便代還知青州
東封以供億勤勞超拜都官郎中判三司勾院出知揚州屬歲

儉盜起兼淮南東路安撫使進秩司封王旦言其蒞事和平可寄方面值洪州水選爲江南轉運使饒州產金縱民販市官責其算人甚利之名拜右諫議大夫集賢殿學士知益州果六任蜀策克勤吏職處事精審所至有治迹代還知通進銀臺封駁司糾察在京刑獄真宗稱其敏而能防拜給事中權御史中丞時茶法甚敝詔與學士李迪御史呂夷簡同議經制稍寬其舊有疾遣醫存問遷工部侍郎致仕卒年六十二錄其子將作監簿瓊琬並爲奉禮郎兄簡官國子博士分司南京

宋搏字鵬舉掖人治毛詩登第補遂寧尉歷濰州司理參軍收白虎令膳部員外郎薦遷右贊善大夫知利豐監徙知滕州改殿中丞通判洪州復薦召還改監右藏庫遷國子博士通判西京留守司賜對便坐徙江南轉運使就遷度支員外郎真宗改

司封員外爲河東轉運使奏大通監冶鐵盈積可備諸州軍數十年鼓鑄願權罷採以紓民力又請科諸州丁壯爲兵以增戎備在任凡十一年兩至夏州界部發居民數詣闕奏事稱旨河東接西北境邊疆未靖屯師甚廣籍摶經制漕運以幹治稱屢詔褒飭就加祠部郎中賜金紫景德四年判三司勾院爲戶部副使復善其職祥符初進刑部郎使契丹卒年六十六賜其孫出身子可法至太子中舍舜元登進士自筠州判官爲著作佐

郎

鄭向字公明陳留人登進士爲大理評事通判蔡州累遷屯田員外郎知濠蔡二州召試集賢院除三司戶部判官修起月注遷度支員外鹽鐵判官出爲兩浙運副疏潤州蒜山漕河抵于江人以爲便權知制誥同勾當三班院使契丹再遷兵部郎中

提點諸司庫務以龍圖閣直學士知杭州卒五代亂亡史冊多漏向著開皇紀三十卷撫拾遺事頗有所補

趙賀字餘慶封丘人舉毛詩登第補臨朐縣簿有幹才爲寇準所知淳化中調丁壯塞澶州決河衆多逸去獨賀全所部而歸父老張樂迎賀準使由譙門過以旌其能改大理評事鹽池吏歛緡錢選賀往鈎校悉得其奸真宗幸澶淵遣使八人省州縣賀以太子中舍安撫京東改殿中丞歷明宿二州通判徙知漢州爲政精明吏不敢欺召權三司戶部度支判官出爲京東西兩路運副益州路轉運使尋糾察在京刑獄遷工部郎中提舉諸司庫務爲江淮制置發運使軍將分部漕船舊主于吏受賄不平富者或數得僥郡因商販規利貧者至不能堪賀乃籍諸州物產厚薄分劇易爲三等視其功過率自裁定吏不得施其

姦歲漕米溢常數一百七十萬蘇州太湖塘岸壞並海支渠多
廢水侵民田詔賀與兩浙運使徐奭兼領其事伐石築堤浚積
潦自吳江東赴海流民歸者二萬六千戶遷給事中判宗正寺
知壽州卒賀事繼母至孝以嘗得運使李中庸薦改官後中庸
沒無子賀爲主葬圖其象祀于家子宗道終集賢校理

李垂字舜工聊城人咸平中登第調湖州錄事叅軍上兵制將
制書名爲崇文校勘遷著作郎館閣校理又上導河形勝書三
卷欲復九河故道累修起居注執政丁謂惡不往謁罷知亳州
遷穎晉絳三州明道中還朝閣門李康伯稱之曰君文學識論
當爲知制誥但宰相未相識盍往見之垂曰我昔謁丁崖州則
乾興初已爲學士矣今老大焉能看人眉睫莫推轂乎道之不
行命也執政以爲做復出知均州卒年六十九 五子仲昌最

知名銳于進取嘗獻計修六塔河無功自殿中丞責英州文學
叅軍

陳知微字希顏高郵人咸平五年進士解褐將作監丞通判欽
州擢著作佐郎直史館俄充三司戶部判官使契丹遷太常博
士判三司都磨勘司出爲京東轉運副使奏還東平監所侵民
田六百八十家又決古廣濟河通運路罷夾黃河歲減夫役數
萬計遷右司諫徙荆湖南路轉運使召拜比部員外郎知制誥
淮南儀遣巡撫所至按視儲糧察諸官吏能否使還判吏部銓
兼刑部又判司農寺糾察在京刑獄爲玉清昭應宮判官卒年
五十平生詞藻雖無奇采而平雅適用思亦敏速儀狀甚偉沉
厚有材幹不務儼察時人許其能處劇有集三十卷子舜卿奉

禮部堯卿祥符五年進士

李防字智周內黃人登進士爲莫州軍事推官括磁相二州逃戶田增租賦十餘萬因請均定田稅凡縣有破逃五十戶者令佐降下考百戶殿三選二百戶停所居官能招攜者旌賞之改著作佐郎通判潞州遷秘書丞體量兩浙民饑建言逃戶田宜卽名人耕種使人不敢輕去畝而官賦常在京師請置折中倉聽人入粟償以江浙荆湖物擢開封推官請與判官問三五日卽府司軍巡院察冤獄出爲陝路運副以城卒代沿江水邊歲省民丁加意農作陞梓州路轉運使入爲工部員外郎三司戶部判官景德初江南旱防與張知白並爲安撫使言奏義增江淮兩浙荆湖權酷錢民頗煩擾詔止之移江南轉運言制司官鬻淮鹽役使兵夫輦載民以爲病且多漂失之患請一切報罷而仍令商人入錢帛芻糧給以鹽斤公私皆利後多采用其

言徙知應天鑿府西障口爲斗門洩汴水民甚利之徙興元復
除判三司鹽鐵坐失舉免官後起通判河南累遷給事中知延
并耀潞四州卒生平精力過人多識鑿好建明利害所至必有
論奏朝廷頗施行之在江南議晏殊於童子命賦詩薦用皆由
此

梅詢字昌言宣城人少好學有辭辨登進士判利豐監遷著作
佐郎御史臺推勘官預考進士於崇政殿真宗奇其占對詳敏
名試中書除直集賢院會討李繼遷請以朔方授潘羅支使自
攻取遣行未至而靈州陷還爲三司戶部判官屢上書請遣大
臣臨邊募遊手擊賊論曹瑋馬知節可用傳薛瑒當誅田紹
斌王榮可責其效以贖過凡數十事其言甚壯後屢坐事降通
判杭襄二州知蘇濠鄆三州徙兩浙運副判三司開折司湖北

陝西轉運使坐薦未能貶懷州團練副使徙池州嘗夢人告曰
通判呂夷簡必爲丞相詢待之甚厚果得其力起知廣德軍累
遷翰林侍讀學士羣牧使至給事中知審官院仁宗御邇英閣
覽歷代戶口登耗之數顧謂侍臣今天下民籍幾何詢對曰前
代帝王恭儉有節則戶口充羨賦斂無藝則版圖衰滅炳然在
目自五代之季生齒彫耗我太祖受命太宗真宗休養百姓天
下戶口之數蓋倍前矣因詔三司及編修院檢閱以聞爲人性
儉薄兼以卞急好進侈於奉養至老不衰久乃出知許州卒

陳貫字仲通相州人徙河陽少儻以布衣論邊事言朝廷寬
傳潛張昭允之誅故復致楊瓊王榮喪師請自今凡遇合戰奔
歸主枝皆斬大將死裨枝無傷與奔軍同軍劔城圍別部救不
至以逗留論真宗識其名舉進士擢寘高第調臨安縣簿召爲

著作佐郎歷知衛涇二州督察盜賊禁戢無賴簿書筭庫賦租
出入皆自檢覈嘗語僚屬視官物如已物州憚其嚴擢利路轉
運使歲餼出職田以賑計富民口悉發其餘徙陝西累遷河北
轉運使請疏徐鮑曹易四水興屯田徙河東歷三司戶部鹽鐵
副使刑部郎中直昭文館知相州還朝卒嘗著兵略上形勢選
將練兵論三篇大略言地有六害今北邊旣失古北之險自威
武城東距海三百里沮澤磽确所謂天設地造非敵所能徑入
由威武西極狼山不百里地廣平利馳突此必爭之地凡爭地
之利先居則佚後起則勞宜有以待之又言昔李漢趙守瀛州
契丹不敢視關南尺寸地今之將帥大抵用恩澤進與國初不
同故敵勢益張外兵不振幾二十年至於禁旅但賴廩給賜予
恬于休息目不識攻戰可以衛京師不可以戍邊境請募土人

隸本軍籍丁民爲府兵使北捍契丹西捍夏人敵之情僞地之險易彼皆素知可不戰而屈人之兵矣世頗稱之子安石字子堅以蔭及第嘉祐中爲夔陝運判民蓄蠱毒輒捕誅又圖示以解毒藥方患日衰息擢提點陝西刑獄攝帥鄜延諜聞敵動靜敕邊民備禦寇至無所獲而去聖書嘉獎歷使京西河東淮南京東不肯保李定持服士論多之遷戶部副使集賢殿修撰河東都轉運使佐韓絳行鹽法謂興事當有漸急則反擾令出鹽券付民使隨所貿易鬻畢而歸券私販爲減進天章閣待制王中正帥東師駐白草平命持四十日糧彌月未至發民再餉李舜舉劾其專詔會逮俄而他路餽糧多不繼神宗察其無罪赦之名爲戶部侍郎進吏部選人久次將改京官臨當引對往往沮以微文一跌不復安石特爲奏免以絕宿弊遂爲後法出

知河陽軍至龍圖閣直學士卒年八十一

狄棐字輔之長沙人仁傑十四世孫少以文謁路振深器愛妻之以女登進士調大理評事知分宜縣轉開封司錄改知壁州與寇準厚薦通判益州累太常少卿知廣州加直昭文館代還人稱其廉拜右諫議大夫龍圖閣直學士權判吏部流內銓出知滑州進給事中徙天雄軍會給郊賞帛士卒譁謀降知隨州進樞密直學士歷知陝鄭二州河中河南二府復判流內銓卒其爲政愷悌不爲表樹死之日家無餘貲子遵度字元規少穎悟爲志於學每讀書意有所得卽仰屋瞑視人呼之若弗聞以蔭任襄縣主簿不久棄去好爲古文著春秋雜說多所發明嘗忠時學靡放作擬皇太子冊文裴管公傳人多稱之尤嗜杜詩一夕夢甫爲誦世所未見詩及覺纔記十餘字因足成之

爲佳城篇官至侍御史卒有集十二卷

郎簡字叔廉臨安人幼孤貧從學四明朱頰長學文沈天錫登進士試校書郎知寧國縣徙福清有石塘陂歲久湮塞募民浚築溉廢田百餘頃邑人爲立祠調隨州推官真宗引對除著作佐郎知分宜徙寶州有縣吏死于幼贅埒村其貲于長屢訴不得直簡爲直之又徙藤縣興學養士俗爲一變始有舉者歷通判海州提點利州路刑獄度支員外郎廣南東路轉運兼知廣州擢秘書少監捕斬賊馮佐臣入判大理寺刑部出知江寧歷右諫議大夫給事中以工部侍郎致仕卒年八十九簡性和易平居宴語惟以宣上德救民忠爲意尤喜賓客卽錢塘城北治園廬自號武林居士導引服餌晚歲顏如丹尤好醫術遇人有疾多處方療之有集驗方行于世知杭州孫沔榜其里門曰德

壽子潔從父之官頗無廉稱後終都官員外郎

張若谷字德繇劍州沙縣人登進士調巴州軍事推官遇蜀寇掠隣境若谷率衆守禦賊引去更全州真宗召見改大理寺丞知濛陽擢廣寧鑄錢監歲餘所贏三十萬緡擢知處州歷江湖淮南益州轉運江淮制置發運使入爲三司度支鹽鐵副使累遷右諫議大夫知并州朝廷欲通敵情歲以繪錦令麟府市蕃部馬廢罷已久若谷奏復之馬歲增入邊戎兩利改提舉諸司庫務權判大理寺進樞密直學士歷知涇與揚州成德軍江寧府入知審官院通進銀臺司糾察在京刑獄移應天府改龍圖閣學士徙杭州歲饑斥廩設糜以賑權判吏部流內銓復知洪州所至有循良跡不矯激取名宰相張士遜引拔累官尚書左丞卒

陳大素字仲華河南緱氏人家行修治登進士由大理評斷累
至少卿號稱明習歷官二十餘年遇朝廷大疑獄必召大素預
議大素爲推原人情傳以法意據文直斷不求曲當衆皆釋然
以爲不及或所論有不中臨案每忘寢食雖寒暑不變子弟有
止之者答曰固圍之苦豈勝案牘之勞哉以耳疾求罷上多其
任職弗許累遷兵部郎中歷知江陰軍充明二州皆著政績卒
同時有馬尋者須城人舉毛詩學究判大理寺稱明習法律
有饑民羣入富家掠囤粟尋奏其情與強盜異得減死論著爲
例歷提點兩浙陝西刑獄廣東淮南兩浙轉運知湖撫汝襄洪
宣鄧潯八州終司農卿又有杜會者濮州人爲吏號知法嘗
言殺人者死傷人者刑先王不易之典律謀殺已傷則絞蓋甚
其處心積慮陰致賊害爾至於故殺初無意必須已死乃有殺

名苟無殺名而用死法則與謀殺孰辨國朝因唐大中制凡已傷未死已死更生皆論如已殺自此不知殺幾何人矣請格弗用其有近世赦令殺人已傷未死者皆得原減亦非律意請傷者從律保辜法限內死者論如已殺勿赦皆著爲令

張傳字巖卿唐功臣公謹後裔祖播任亳州團練副使徙居于譙傳及第選著作佐郎知奉符縣方修宮觀以辦事稱向敏中薦知楚州歲饑發上供賑貸活以萬計上章待罪詔獎之遷江西江東提點刑獄入權三司鹽鐵判官會河決濟北民多被害命安撫京東歷陞三司度支副使請外遷太常少卿知應天除右諫議大夫徙青州遷給事中知鄆州後知應天以工部侍郎致仕卒傳強力治事七爲監司所至審覈簿書勾擿奸隱州縣憚之嘗言吾所以事事致察者正以愛州縣也吏不敢慢則不

復犯法矣。天禧中有術士出入禁中嘗游秦悼王家自言年數百歲歷唐肅代朝傳一見訊以末事闕然語屈人服其智。

崔立字本之開封鄆陵人祖周度仕周爲秦寧軍節度判官慕容彥超叛責以大義見殺立登進士爲果州團練推官役兵輦官物因道險率衆錢備舟載還真宗記之改大理寺丞知安豐軍大水壞期斯塘躬督繕治進殿中丞歷通判廣許二州提舉滑州決河調民出芻槿計其用有餘而下戶未輸者尚二百萬悉奏弛之權知江陰軍屬縣港堰久廢教民濬治溉田數千頃開橫河六十里疏通漕運遷太常少卿歷知棣漢相潞兗鄆涇七州兗歲大饑募富人出穀振餓者全活甚衆立天性淳謹兼有識見能知人韓琦尚爲布衣以女妻之亦喜論事尤不肯言符瑞祥符間前後凡上四十餘事言徐州大水江淮連旱無爲

州烈風金陵火。此皆天所以警驕情。戒淫伏也。時論避之。以右
諫議大夫知耀州。改知濠州。遷給事中。進工部侍郎。致仕卒。

張逸字大隱。鄭州滎陽人。及第為校書郎。知鄧城。有能名。知州
謝泌將薦之。先設几案置章其上。望闕再拜曰。老臣為朝廷得
一良吏。他日引對。真宗問欲何官。對曰。母老在家。願得近鄉一
幕職歸奉甘旨足矣。授澶州觀察。推官母喪服除。帝雅賢泌。引
對。又問改大理寺丞。知長水縣。留守王嗣宗厚遇之。徙青神。貧
不能行。嗣宗假俸半年使辦裝。既至。興學校。教生徒。邑人陳希
亮揚其相繼登科。逸改其居曰桂枝里。縣東南有松柏灘。夏秋
暴漲多覆舟。逸禱于江神。不踰月為徙五里。時人異之。再遷太
常博士。知尉氏縣。擢監察御史。提點益州路刑獄。使契丹。還歷
兩浙。移河東。陝西三路轉運使。以龍圖閣待制知梓州。進兵部

郎中知開封有僧求內降給田逸不許仁宗以爲能守法禁中
稍通女謁逸請令官司糾劾從之無何又以樞密直學士知益
州至是凡四至其民風熟諳人不敢欺華陽有騷長殺人誣道
旁行者縣吏受財繫誣者反令殺人者守囚囚不敢言逸一見
卽曰囚色有冤吾見守者氣不直得非枉乎囚叩首決訊果服
蜀民驚以爲神會歲旱留意堰務壅江儲水以溉民田民大饑
禁殺耕牛決配犯者雖遭屢歎不致爲害民思念之未幾卒于
官

張旨字仲微河內人父延嘉讀書不仕州上其行賜號嵩山處
士旨以保定司法叅軍上書運使鍾離瑾願補縣尉捕賊自効
瑾奏徙安平尉捕盜三百餘人嘗與賊鬪流矢中臂猶手殺數
人擢試校書郎知遂城縣遷著作佐郎明道中淮南饑詣宰相

陳救荒之策命知安豐縣募富民出粟以給餓者浚潁河三十里疏泄支流注芍陂爲斗門溉田數萬頃外築堤以備水患再遷太常博士知尉氏縣徙過判忻州元昊反遷屯田員外郎過判府州府舊依山爲險無外城旨固請創築未就寇遽至乃聯巨木補其罅守以強弩中外不相聞者累月人心震恐旨矯詔出庫中雜綵數千匹賜築城卒皆東望呼萬歲賊疑以爲救至會賊先斷汲路至夜開門令官軍壁兩傍護民出汲賊不敢近又督居民乘城力戰賊死傷者衆方解去以功遷都官員外郎徙知萊州葉清臣舉旨材堪將帥名對改知邢州擢提點河東路刑獄范仲淹歐陽修復言其鷙武有謀除閤門使累遷光祿卿知潞晉二州以老疾權判西京御史臺卒

鍾離瑾字公瑜合肥人登進士爲簡州推官以殿中丞通判益

州擢開封推官出提點兩浙刑獄徙淮南巡副歷京西河東河
北轉運使改江淮制置發運使置牐揚州召伯埭旁人以爲利
因奏計多致東南物以賂權貴御史臺請劾狀帝面諭亟還所
部累遷刑部郎中三司戶部副使除龍圖閣待制至直學士知
開封府卒

張洞字仲通祥符人太常少卿惟簡之子軀幹長大眉目如畫
自幼開悟卓犖不羣日者異之謂當以政學顯日誦千言爲文
甚敏未冠睚然有聲遇事慷慨自許以布衣上討元昊方略名
試舍人院擢將作監簿復登進士調連水判官親喪改穎州推
官民劉甲主使弟乙毆婦死吏當夫法洞以律分首從既非夫
本意常坐主使遂出其夫朝議從之由是知名晏殊知永興奏
洞管勾機宜文字改大理丞知鞏縣留守西京復奏爲司錄深

敬之殊晚節用刑頗驟洞自以不負所知輒爲諫止高若納吳
育薦充秘閣校理知太常禮院會宰相陳執中死謚榮靈其孫
訴之洞奏生不能正其法死猶當正其名聞者避之劉敞議郭
后祔廟謂春秋之法不二嫡當許其號不許其禮洞奏后嘗母
儀天下無大過與哀姜之惡不同敞議非是轉太常博士判登
聞鼓院在館閣久數有建明仁宗方嚮儒術以洞爲知經賜飛
白善經二字洞獻詩爲謝復詔獎轉祠部員外郎出知棣州會
河決甫退強弱占不均官爲標給蠲其租以緩新集上奏河
北東路民富蠶桑契丹號爲殺緡州朝廷以內地不復置慮滄
景當孔道兵守多缺契丹時以販鹽爲名往來境上不可不察
願度形勢置帥增戍以控扼之復與歐陽修極論天下久安緡
紳崇尚虛名類以寬厚沉默取名遇事無所補益非朝廷福又

言諫官既重其任。不數年輒至顯位。自今當緩其遷。使端良之士不亟易。而浮躁者不妄進。名權開封推官英宗轉度支員外郎。上方在疚。或經旬不御正殿。疏言陛下春秋鼎盛。豈宜自比沖幼之主。當躬萬幾。攬羣材以稱先帝付畀之意。朕元元之望。命試開封舉子賦題孝慈則忠。上意其譏諷。韓琦爲之解。又論唐宗室多賢宰相。蓋知學問使然。國家本支蕃衍。無親疏一切厚廩。不使知辛苦。婢妾聲伎無多寡之限。至滅禮義。極嗜欲。若今祈國公宗說。恃近屬驕貴。不道貸之則亂法。刑之則傷恩。宜因品秩立制度。更選老成教授之。轉司封員外。權三司度支判官大臣忌之。出爲江西轉運使。值荐饑。奏免徵民積歲逋賦。民輸油絹不中度者。命計尺寸。輸錢民便之。移淮南轉工部郎中。

卒年四十九

弘簡錄卷一百六十二